



CAPUT XXXII.

De Moratorio, & Pacto præjudiciali.

§. 377.

Moratorium deinceps concedi ne liceto.

§. 378.

Neque pactum præjudiciale, id est; compositio cum creditoribus, vi cuius iidem partem Nominum suorum remittere teneantur, admittendum est, præter quam, si tertius solutionem aeris alieni post deductam summam, cuius remissio petita fuerit, residui in se receperit, et solutio hoc modo suscepta creditoribus magis conveniat, ac ea, quam de Bonis Debitoris sperare possint.

§. 379.

Qui hoc modo debita aliena in se transtulerit, creditoribus secundum pactum initum, vel solutionem, vel de promissa futura solutione idoneam cautionem præstare debet.

§. 380.

§. 380.

Creditores, quibus Jus prælationis competet, vel qui pignore aut hypotheca speciali juxta §phum 339. muniti erunt, et hoc Jure unice niti volent; Pactum præjudiciale inire haud teneantur: Reliqui vero potioribus suffragiis accedere debent.

§. 381.

Potiora suffragia non majori consentientium numero, sed nominum seu Actionum valore computanda sunt. Quod si nomina eorum, qui Pactum inire volent, ac eorum, qui illud recusabunt, utrinque paris sint valoris, numerus personarum suffragia dirimito.

§. 382.

Antequam per Sententiam decidatur, an quis potioribus suffragiis accedere teneatur? creditores majora constituentes de actionibus suis valide docento.

§. 383.

Pactum praejudiciale apud Judicem petendum est, cui Debitoris persona suberit.

§. 384.

Quamprimum pro pacto praejudiciali obtinendo a debitore supplicatum fuerit, Judex universos Creditores publico Edicto ex officio citare; circa Bona vero Debitoris etiam ad postulationem unius Creditoris ea omnia providere debet, quae moto Concurso providenda sunt.

§. 385.

Si compositione cum Creditoribus modo ante dicto, vel alio quovis inita, Debitor se doli reum fateatur, vel doli convictus, aut de eodem suspectus sit, Judex nulla compositionis habita ratione ex officio contra ipsum procedat, et Reum commerita poena afficiat. Eo tamen Casu inquisitio, ac poena Debitori doloso condonari potest, si per eandem Compositio illuderetur, et Creditores nimium damnum pati cogerentur.